

Aktuelna tema: Gdje su DF i Mahir Mešalić bili prije dvije godine kada je smijenjeno više od 70 ljudi!?

Nakon teksta pod nazivom „Dvojac SDA i HDZ snosi najveću krivicu za politizaciju obrazovanja“, objavljenog 17. aprila 2018. na jednom lokalnom portalu, prenesenog, opet, iz jednog dnevnog lista, a vezano za inicijativu Mahira Mešalića, člana DF-a, za održavanje tematske sjednice Predstavničkog doma Parlamenta Federacije BiH, na kojoj se raspravljalo o depolitizaciji obrazovanja u budućnosti BiH, oglasila se prof. dr. Amra Odošević, akter svih dešavanja na Univerzitetu u Tuzli posljednjih godina, uz to stranački neopredijeljena osoba, čiji tekst objavljujemo u cijelosti.

“Jedini motiv mog oglašavanja, zapravo je, da konačno istina izađe na vidjelo o dešavanjima na Univerzitetu u Tuzli i njegovoj politizaciji koja je počela 2016. godine. Šira javnost Tuzlanskog kantona, da budem preciznija, budžetski obveznici koji finansiraju ovaj Univerzitet, imaju pravo da znaju istinu.

Predizborna kampanja davno je počela i sada je u svom punom zamahu, ali bi bilo u najmanju ruku lijepo, da ne kažem pošteno, pridjev koji naši političari mnogo vole i koriste, da neko počne govoriti istinu, a ne samo ono što odgovara partiji čiji je neko član. Kao da niko od aktera spomenutih događaja nije živ, tako da je sve pušteno mašti na volju i pričaju se bajke.

Konkretno, ovdje se radi o izjavi Mahira Mešalića, poslanika Demokratske fronte, koji je jedan od inicijatora tematske sjednice Predstavničkog doma Parlamenta Federacije BiH, na kojoj se u utorak raspravljalo o depolitizaciji budućnosti obrazovanja u BiH, a vezano za dešavanja i politizaciju visokog obrazovanja, konkretno Univerziteta u Tuzli. Po mom skromnom mišljenju, inicijativa je došla kasno, ali je došla, jer su procijenili u stranci da je sada pravi trenutak. Izbori se bliže. Pa ja ću sada pitati Mahira Mešalića gdje je bio prije dvije godine???

Zašto prije dvije godine, tačnije u septembru 2016 godine? Pa zato, što gospodine Mešaliću i uvažena javnosti, nije tačno da se u martu 2017. godine, prvi put u historiji otkako postoje kantoni, ali prvi put i u istoriji Evropskog visokog obrazovanja – a mi smo, ako ništa, geografski dio Evrope – desila neviđena politizacija Univerziteta u Tuzli!

Sve se to desilo, ali par mjeseci prije, tačnije 9. septembra 2016. godine, kada je Skupština TK na vanrednoj sjednici donijela prve izmjene Zakona o visokom obrazovanju TK kojom je smijenjeno oko 70 ljudi. Smijenjen je kompletan Senat, najviše akademsko tijelo Univerziteta, koji je tada brojao 50 članova, zatim 10 dekana zajedno sa prodekanima (20 prodekana) rektor, tri prorektora i Upravni odbor. Pa vi izbrojite koliko je ljudi u roku od 24 sata smijenjeno!

Tada je politika, poštovani gospodine Mešaliću, ušla defenitivno na Univerzitet. Gdje ste bili tada? Tada je postavljen od strane SDA v.d. rektor, da budem preciznija rektor, a on je imenovao privremeni Upravni odbor kojeg je aminovala SDA) prof.dr.sc. Samir Nurić, koji je onda svojim rješenjem razriješio dekane i sve ostale sa funkcija.

Neko će sada reći da je rektora tada izabrao Senat i da je procedura bila akademska i da je autonomija Univerziteta sačuvana. Ali. istina jeste da je rektora izabrao Senat, ali privremeni, čije članove su predložili v.d. dekani imenovani od strane v.d. rektora!

Kasnije, kada je prof.dr.sc. Nurić smijenjen sa funkcije rektora, kao najveći “dušebrižnik” i borac za depolitizaciju Univerziteta, pojavio se DF-ov sadašnji visokopozicionirani član i odatle, od stranačkog kolege, vjerovatno i sve informacije kojima raspolaže Mešalić.

Ali, javna je tajna da je kompletan menadžment, zajedno sa Upravnim odborom, postavila tadašnja vlast Tuzlanskog kantona. Tada je prvi puta u istoriji visokog obrazovanja u Evropi instaliran i privremeni Senat. Nevjerovatno je, ustvari, koliko se ova činjenica i podatak, da je u 24 sata smijenjeno više od 60 dobro pismenih ljudi, prosto ignoriše u svim izjavama vezanim za Univerzitet u Tuzli, bez obzira da li su to izjave aktuelnih političara pozicije (što je razumljivo) ili opozicije?!

Možda, gđin. Mešalić ne raspolaže ovim informacijama, koje su uzgred vrlo lako provjerljive, ali se u svakom slučaju morao, kao ozbiljan političar, barem dobro informisati, sve provjeriti i onda izaći u javnost. Ali naši političari su naučili da rade i pričaju paušalno, na osnovu rekla – kazala, pa se onda nije za čuditi.

Tada je, 9. septembra 2016. godine, Senat smijenjen iz samo jednog razloga: nije slušao vladajuće. Radio je i donosio odluke u skladu sa važećim Zakonom i Statutom Univerziteta. Nije popuštao pritiscima. I zato su profesori, koji su tada sjedili u Senatu i obnašali funkcije, kažnjeni. Smijenjeni su! Ovo je prava istina.

Neko će sada možda pitati zašto ovo sada iznosim, a nisam prije? Pa, jednostavno mi se prelila čaša. I ne mogu više ni da slušam, ni da čitam ove dezinformacije, da ne upotrijebim neku težu riječ. I da ne mogu pustiti da se sada kupe predizborni poeni na osnovu ove "velike brige" za visoko obrazovanje i borbe za „depolitizaciju“.

Jedina rečenica koja je istinita, i s kojom se potpuno slažem, je da je ova politika i oni koji je vode i predstavljaju (ali uz pomoć trenutne opozicije, koja je šutjela tada i stidljivo nešto malo komentarisala), narušila višedecenijski ugled Univerziteta u Tuzli. (Piše: prof. dr. sc. Amra Odošić)

Date: 19-04-2018